

蘊  
悖  
閣  
別  
集

蘊懷閣別集自序

駢散之文古無定體謂散體尊駢體卑駢體易散體難者

志在書法

下士之嚮言也蹈庸熟習浮夸俳優侏儒風斯下矣若欲  
追漢京之風規馳建安之氣質則必託興高遠游心元穆  
澄之欲其清積之欲其厚澁之欲其澹揚之欲其華縱之  
欲其往操之欲其留駢乎散乎作者何所區分乎讀者何  
所軒輊乎有唐之文莫盛于元和然韓集進學解盤谷序  
諸作散而駢者也碑銘諸作鉤章棘句駢而散者也柳集  
碑文規仿六代既深既博亦駢亦散世之論者謂韓柳薄  
駢體不爲陋矣誣矣駢文至宋古義寢亡明三百年一蹶  
不振我朝迦陵林蕙諸家各自矜奮踔厲風發覈之于

古去以千里自胡氏稚威振起衰弱竝世宏材從而和之  
厥道斯昌歷選英華於茲爲盛夫惟天地之道一陰一陽  
禮俗之變一文一質文章亦然斟酌事物權衡體勢錯綜  
參伍行而宜之夫何駢散之與有余雖不足以與乎此而  
自以爲猶能見之也余雖有以見乎此而惜乎其不能爲  
之也敢誦其所聞質諸當世之治古文者鎮洋盛大士

蘊懷閣別集目錄

卷弟一

金華山芙蓉峯賦

遊赤松山賦

尖山觀潮賦

檀園賦

卷弟二

楚辭注釋參校序

泉幣儲珍序

溪山卧遊錄序

唐聖張氏宗譜序

李曉潭竹湖山館古泉拓本序

練川七生圖序

黃香鐵江天永慕圖序

雪夜集大庾相國海淀園居序

翁覃溪學士蘇齋賞菊詩序

粵東七子詩序

陸萊臧詩集序

淮上唱酬詩序

棗花樓詩鈔序

徐秋士詩集序

蘭素女史繡餘吟課序

卷第三

與張椒卿書

與湖州趙季由太守書

答徐桓生書

貽虞山友人書

與譚韶九書

與畢丈季瑜書

答蕭梅生書

與潘彥輔書

答黃齋青太守書

卷第四

重修古三茅觀碑

巢棲碑銘

杭州兵備道署新築退思居記

澹然居記

石刻宋賢誥勅像贊跋

虞山唐墅志跋

郎芝田擬古畫冊跋

淞塘蟹舍畫冊跋

彭湘涵誄

胡母汪孺人誄

李安人誄

金華山芙蓉峯賦

別集一

浙東山水甲天下金華屬會稽西部梁武置郡靈閣益顯  
八詠樓聳雙溪水清芙蓉一峯尤爲諸山之冠柔兆之歲  
余過東陽攀嵯涉澗浹旬斯返元契所託塵想頓息援筆  
作賦以紀勝遊其辭曰

縈僊都之清遠廓靈境之幽遐閃金星之爍爍爭婺女之  
光華城郭錯峙而縈帶林厓旒靄而鬢髻靈溪沉澆以瀆  
滉碕嶮磬確以崕呀鳥墮絕壁虹銜斷槎松拂石梁之瀑  
蓮飄鼎湖之花爾其峻極之狀屹若屏障增岡重阻列阜  
延曠赤松左倚智者右向削曉兕之孤巒拱崑嶷之疊嶂  
十步五步倏倏倏仰大山小山若爭若讓梳雲髮搶之尖

摘星旌石之上九朵空青變滅一手萬綠摩盪初晴之辰  
霞晃朗其若飛欲雨之夕霧冥濛而不放三洞之勝地志  
所傳北山之峯別開洞天有徐公湖水清且漣瀉乎山橋  
經乎鹿田素練漾其激潔文錦濯其麗鮮分兩派以傾注  
羌若斷而復連十里而近兩崖之間有竹一坡有石一拳  
循竹石以孤往忽異境之豁然萬叢夾岍兩石傑立如負  
黿背若垂鵬翼絕冥萬丈而蒼莽孤煙一綫而峭直遠山  
林密秋不霜而自紅陰厓溜寒天無雲而亦黑嘉蔭葳蕤  
以窺茂異芩蘆薈以翕葩絲筵抽節而鮮潤抽梧挺榦而  
秀特青虬蜿蜒蟠其根翠羽啁啾繞其側藤蘿屈曲之形  
莓蘚斑斕之色訝太古之奇字匪人間之可識則有潛岳

古寺山樵舊莊胡叟耕隱之庀王埜讀書之堂方疏圓井  
層軒曲廊矗岧嶻之浮柱跨偃蹇之飛梁入幽邃之網戶  
闢窅窅之洞房溯曩躅於既往緬風流之未央道士坐帳  
而飼鶴仙人攜杖而叱羊胡麻之飯初熟石鼎之藥正香  
拾瑤草兮誰贈折瓊枝以迴翔睇瑤臺之縹緲鏗入琬之  
琳琅恍置身于瓊樓之百尺而涌現乎蓮花十丈之金光  
亂曰金華之山環窈窕兮芙蓉之峯削青沓兮碧城容容  
巨天表兮煙扁霧橫鬱繚繞兮登其崇岡值秋杪兮飛霜  
迎節白石皓兮急晷乍逝涼月曠兮樂哉斯遊暢襟抱兮  
輜輶僊轡揚旛旒兮垂綏宛虹駕鸞鳥兮愛而不見勞心  
悄兮

遊赤松山賦

若有人兮山之側，叱羣羊兮走亂石。山中道士指而笑，市上兒童舊相識。林端獨鶴之巢天，半雙鳧之鳥醒塵夢。于清秋訪靈真之遺蹟，迺尋遠壑爰陟岑岳。十步五步千嵐萬嵐，峯鬢兮窈窕。泉眼兮空嵌，花霏洞門之屋。雲張石上之飄金華之秀林，壑並美赤松歸立青霞。蔚起積翠，一于丈環城二十里，迤邐兩岡之坡。約束雙條之水，彙衆妙于一覽窮萬象。于尺咫杖策而上，緣梯而升。牽蘿兮翦蔓，捫葛兮扶藤。筧卧逕而路滑，薜沒泥而溜凝。巖切細若束帶，石骨峭欲生稜。挂雪練之一匹，藏白雲之數層。絕磴兮高撐飛梁兮徑度，登蘭皋以裴裒。歷桃源而散步，二仙之祠。

縈抱於谷口三峽之橋敲斜乎沙路人行竹外之月衣溼  
桐間之露爾乃披岫橫睇巖軒凌傑閣俛危垣芙蓉排闥  
薜荔當門虎出林而驚鳥鬼嘯樹而欺猿霧黶黶兮晝不  
掃星熒熒兮寒可捫行復行兮四山寂遠復遠兮天影碧  
蓮分峯頂之青綺奪仙城之赤問溪上之牧童與山間之  
樵客惟見長林豐草秦松漢栢無邊青杳之天何處神仙  
之宅瓊瓏兮翠嶂潺湲兮澄湫曲房兮延夏網戶兮迎秋  
瑤之圃兮山之幽駭白鸞兮駕青虬路漫漫其修遠羌延  
佇而生愁

尖山觀潮賦

鹽官地屬杭郡東瀕大海龜赭兩山約束閼隔潮不得騁  
與山爭勢洶而爲濤一日夜再至陵突尖山之麓沈沈隱  
隱轉騰激洌而西流入于錢塘時屆秋仲士女雜沓揚帆  
挂席周覽瀛壖衽服靚粧盈川破野昔之所謂諸侯遠方  
交遊兄弟並往觀濤乎廣陵之曲江是也歲在丙子八月  
旣望浙西觀察黔陽何茂軒先生率屬按部飭隄防視修  
築以羊一豕一致祭于龍王大神禮成而返神保聿歸賓  
具醉止從公于邁式燕且饗敷陳其事俾示來者

維勾吳之東境隸餘杭之舊疆環十洲而拱峙爲七郡之  
障防樓臺紛其黝糾兮闔閭鬱其莽蒼瞰潮汐之奔迅兮

賊洪流之汪洋乍駕軼拔擢而揚汨兮旋温汾滌汔羌莫  
從而縷詳始則陰霞陡舉遠霧譎變溟島没石林岑插箭  
似神而非儼隱乍見盪日月之雙丸割洪濛之一綫俄而  
排山躍馬驅雲結陳挾輶以走如牆而進千乘並騁萬弩  
齊飛勢踔蹕其上激氣駿黓而下垂遂乃潭淪渤蕩瀕渾  
盪激沸潰濯泆潰淪澗汨白沙觸搏赤岬竦起鮫背翻青  
鰲身射紫旣而煙開霧銷天光次寥鳧雁共狎鼃鼉不驕  
虹蜺倒景而綺合鯤鱗吐沫而珠跳輕颿則落日遙挂靈  
旗則無風自飄猶復一氣吐飲衆壑呀呷精孕金蟾葩剪  
石蜃浩浩茫茫忽不知其所止汨汨曠曠曾莫窮其津涉  
海之大也迴互萬里潮之來也絳厯萬古溯洪荒之奠定

緬明德於神禹繫東南之澤國歷千祀而利溥載稽海塘  
之志備載濬築之功

皇朝奄有函夏允釐百工頒勤民之實政邁前代而立隆  
列聖功德勤施久遠大賚國帑高築堤堰周巡瀛海親莅  
翠輦哀鴻之集百堵皆作其魚之嘆兆人迺免

皇上顯謨承烈軫閔黎元命所司每歲給咨府庫俾塘工  
計時以次繕完廢者必輯損者復全金隄之固萬世賴焉  
黔陽何茂軒先生以浙西備兵之任爲海疆保障之司督  
工役以勉作進賓僚而周咨時則天宇徵曠秋暉明靄遠  
渚安瀾長林延籟乍潢漾以灑滌旋滂灑以沆漑珠宮貝  
闕神州隱躍之中玉柱虹梁仙窟清虛之外遠則陵阜截

辭鱗鱗纒屬近則城郭廣袤厯厯如繪於廓靈海長爲委  
輸衍溢陂池資其滂沛吾師于是具灌獻迓靈祇爲

朝廷答神貺爲蒼生祝福釐陳笙薦酌調竽撫瑟鐘鼓旣  
備備羞具設文儒景從毗庶懽洽展詩發志授簡命客清  
歌四座隨白雲而高飛碧霄千頃共澄瀾而一色大士辱  
廁負笈之列敬申測蠡之辭樂滯疾之悉解誌壯遊於今  
茲愧夫元虛之賦枚生之發俱無足以當之

檀園賦

客有懷練祁之勝者百數十載白雲誰侶青山誰買化鶴  
之石蔓萎乎荒煙飛僊之槎寂寥乎滄海當其庀近三隱  
閣起六浮窈窕紺寒之室清虛墊巾之樓聊因樹以爲屋  
或就岬而牽舟不衫不履而皆逸客亦莊亦老無非勝流  
主人絕交宦而晦迹視榮利如脫屣王霸之茆屋蓬戶以  
病歸隱周黨之短布單衣連徵不起此間可以寤宿可以  
寤歌且復五日畫山十日畫水蓬蒿仲蔚之家松菊淵明  
之里終吾生以徜徉極幽居之樂矣斯園也周迴廊廡環  
繞漣漪螺粘苔髮魚穿荇絲蜘蛛網戶而煙細蟾蜍窺簾  
而影遲方春乍晴雜花鬪媚干聲嘯鳥不絕數尺游絲欲

墜南畝之筐筥紛其饒黍東菑之臺笠聚若鱗次加以層  
軒博敞夏室清闕櫻實朱肥荷衣紅醉拳鷺不飛病鶴獨  
睡比王官之谷象其宵深如武陵之源別有天地又何必  
刻藻裁茵雕金飾翠侈博陸侯之園林開竟陵王之邸第  
涼颺颯爽秋意蕭疎秔稻之香滿埜雞豚之社比閭千頭  
之橘官免其稅一頃之豆歲儲其租量十笏兮容鄰愛三  
餘之箸書明月可掬梅花自鋤雪壓枝頭花疑着樹冰生  
水腹澗不通渠乃消九九之寒圍鑪到此爲掃三三之徑  
入室灑如泉石枕漱足移我情煙雲供養豈求人給乍曳  
菅屨偶攜藤笈或染香庵主扣舷而來或松圓老人迎門  
而揖老樹成鱗小舟如芥稚子烹葵山妻剪薤杖有貯錢

門無索債非有意于軒車本無嫌乎湫隘丹林千樹停車  
小杜之詩綠水一灣着色大癡之畫城郭如故風景不殊  
小橋斜曲深巷縈紆過其地者惟見釣月漁叟擔煙蕪夫  
秋霜千樹春水一湖魚鳥仍識田園已蕪夫誰遡乎曾筏  
之所布置而長蘅之所宴娛

華亭范學誠校

楚辭注釋參校序

別集二

在昔騶軒采風楚詩未錄嗣後六義浸替三閭踵興蘊天  
人之瓌才履殞宙之奇變香蘭九畹與衆芳同蕪青山六  
里有可憐之色摭其忠蓋寫其憂愁湘南遷客之吟榛西  
美人之詠時代雖殊其情旨一也羸替鑄興恢廓道訓爰  
及孝武雅愛楚騷傳其學者肇始淮南後則劉子政爲之  
編集王叔師定其章句隋經籍志楚辭于集部中自爲一  
門有郭璞注十卷皇甫遵訓參解七卷又徐邈孟奧宋處  
士諸葛氏釋道騫俱撰楚辭音劉杳又有離騷草木疏諸  
書或隋代散亡或唐時缺軼王逸古本巋然獨存治及趙  
宋則有洪興祖之補注朱考亭之集注以暨吳仁傑楊萬

里錢杲之屠本峻諸家佃古漁今網羅纂輯瓣香什襲津  
逮良多當日山鬼篇成鵠啼猿嘯泊沈淵以後秭歸故宅  
夜雨聞碓夏邱門蕪江潭猶昨霜天冷月恍聽清陰千載  
忠魂懷沙誰弔一時絕調接軫爲難宋玉景差畧堪嗣響  
至于賈生惜誓淮南招隱曼倩七諫王褒九懷濫觴靈均  
僅沾餘瀝郢歌一曲試汨流而討源湘紉五十或移官而  
換羽此優彼絀畛域分矣文約辭微行廉志潔龍門論騷  
叟乎尚已賈生揚子重其才悲其遇昧其制行誚其輕生  
而班固露才揚己之論之推家訓引而襲之以爲顯暴君  
過懟忿霧修曾不思河麋微通飄風攬心山蕪隰棧菅華  
苑柳忠愛之意奚以寄焉故劉勰謂耿介祇敬之論體備

典謨虬龍雲蜺之詞義工比興特豐隆求女鳩鳥媒妁擬  
斯之類稍近詭誣知幾謂宣僖敷政載在周詩懷襄信讒  
著于楚賦頌固非諂刺豈同謗猗與良直尚友董狐持論  
乃爲至當云夫騷以繼詩依經立義彼蒙莊放曠著述猶  
以經名豈屈子幽愁忠愛違乎經旨矧雄鳩佻巧厯鸞弁  
之閔憂蘭芷蕪穢寄茗華之哀怨郢都一望君門九重作  
歌告哀我言維服彼太元之擬易元經之擬春秋曾何足  
以語此哉余素耆楚騷近獲宋槧讐校之餘重爲鈔輯音  
訓詮解旁采諸家竊附己意至疑義所在未敢臆斷俟博

雅者訂正焉

泉幣儲珍序

緬惟義繩握鏡石函肇啓琅書嶰棘范銅寶秩始傳金冶  
炎農神字之模姚媯乘馬之策上幣中幣楸遷乎化居歷  
山莊山宏濟乎歲祲蒼籙八百九府利用赤符四七五銖  
復與輕重則與物權衡沿革則隨時通變嗣後一姓改玉  
必備貨金一州負岫或侈鼓鑄凡夫一刀四出兩柱重輪  
折二折五當千當百之屬諸史彙其源流百家資其稊校  
雖襪慙繇亘而義炳圖牒是宜傾竹素以具析泐貞珉而  
並壽已然而滄海生桑高陵變谷珊鉤鮫淚泣金氣之銷  
沈漆鐙蛻油和石髓而燎炙異豐城之寶劍精光不飛同  
茂陵之金盃土花半蝕加以段桃鳧桌磨鑢毀鑠蠻徽穴

島輦航山海其勵有存者又從而闕之遂乃奉蜨蝦爲靈  
物莫罄和嶠之藏伴釵釧爲辱金不入明誠之目磨丹握  
槩則筆談較易別真挾贗則掌錄爲難此卽梁顧烜之書  
尚存唐封演之徒競出而徒倚撫箋訓飭餽蠹蟬唾分金  
李之餘牙拾張董之慧墜簡恣搜玉卮無當欲使訂鄱陽  
之譌恐復蹈子虛之病也余藏古泉歲更數稔北遊燕趙  
道經齊魯昭王市駿之貲威公求鹿之貨每睹異品輒購  
兼金不吝典裘任啣索米或一緡之選羽耀吉光或百朋  
之錫珍逾郢璞日計月量積鎔累銖覈諸蘭臺彤珥疑剖  
豪芒證以茗玉翠珉合同符節輯成譜錄顏曰儲珍綜卷  
帙所編列悉篋衍所備蓄物經手翫典異耳食此外未經

貯收是冊概從闕畧愧少珊瑚之網掛漏滋多學求象罔  
之珠冥搜是殫若其每卷序次之體恭遵

欽定錢錄之例編年紀事世代相嬗考義研典正閏自別  
餘若壓勝撒帳吉語將馬錢鏡諸品流播緇緇繩足資閱覽  
供養几席亦饒古澤附綴簡末聊識緒餘惟是黃支烏弋  
拔汗閭婆流沙大漠之區十洲三島之境並有鑄冶必求  
徵信古囊偶儲奇品間獲匪忍割愛將俟續編博雅君子  
惠而好我網羅散佚補其不逮是所望焉

溪山卧遊錄序

余性耆泉石情耽翰素六法之學廿載于茲筆鈍若椎心  
頑肖鐵意恚偶託鏤弗舍真沿討所悉畧可贅陳粵自兩  
晉暨乎六朝三祖之稱四聖之目覓乎尚已摩詰畫師將  
軍小李南北別其派唐宋衍其支逮自元明迄於

聖代名家林立鴻製瞻列後進之士追維典型通厥流貫  
師承授受蓋可得而稽焉夫曾臺雲構一壩之所基滄  
溟水深乃百川之統滙彼陟岡者中道而立問津者自厓  
而返卽此藝成而下曷以技進乎神末學膚約詣力單弱  
敝屣而弄荆關望洋而詫范李習率易爲高雅矜詭放爲  
離奇以空諸所有爲士人家風以自我作古爲才人能事

不知精能之至乃顯神通絢爛之極方歸平澹昔者華亭  
擊節於吳興石師服膺於墨井營邱之千巖積雪忠恕之  
一角遠嵐不以疎密分高下也石翁之氣格渾成六如之  
風流蘊藉不以濃澹判優劣也今欲不遵程穰別擅心裁  
盡棄筌蹶獨矜妙悟不學無術貽舛滋多更有剽竊墨藁  
鉤摹粉本鏤碧雕紅模山範水罔巒拱揖之法徑路遠近  
之形竹樹偃仰之容屋宇向背之勢雀燕銖兩不饜乎定  
式鳶魚飛躍頓失其靈機欲步北苑之後塵直比南宮於  
優孟虬鱗之松檉居然黃鶴山樵鼠足之點蕭慘自詡  
梅花庵主此又成規是襲真趣無存詩書之氣積之也不  
深磊落之懷發之也不暢方斯之技奚足取焉下析流弊

上究指歸資深逢原博綜約守功候所臻匪伊朝夕一隅  
慙覲寸管是窺聊爾箸錄有慙證辯狹見疎漏諒不足譏  
續有見聞重爲綴輯云爾

唐墅張氏宗譜序

在胥系傳唐杜晉卿世守其職官史典伯鑿籍父誠深於  
忘祖是以高陽分胄楚大夫述皇覽之初縉雲相黃漢太  
尉辨炎神之統子長孟堅徵援掌故敘列國世家表王子  
侯者此宗牒之權輿譜學所基始也張氏之先彤魚發祥  
孤星主祀佐宣輔周修官仕晉侯老趯幣名聞春秋五世  
相韓七葉翊漢賀婁神道之碑紀其舊德歐陽世系之表  
代有達人丕著正始式觀先燉韓國之派五世傳杜陵八  
世居吳郡十三世徙彭城十七世復歸吳中時則婁侯子  
布佐孫氏有功食采分茅烏弈蕃衍由晉及唐歷年五百  
有餘傳世三十有七至趙宋建隆之代實來虞山洎勝國

嘉靖之初乃遷唐墅迄今三百餘載遠溯韓國六十餘世  
矣其宗譜之作始于道瓊處士治于陳可太學其間克儀  
栢臺晚庵令孚諸家遞有增修道瓊名瑤陳可名國輔俱  
以文章世其家國輔纂成後又數傳族裔邦鎮重爲綴輯  
丙余弁言夫古人保姓以受氏敬宗故收族門內之祭曰  
繫宗廟之主曰祔合食謂之祔合祭謂之祫縣以報本反  
始展親睦族昭穆之位定隆殺之義分別子爲祖繼別爲  
宗繼禰者爲小宗而族屬以序上治祖禰下治子孫旁治  
昆弟而人道迺立慨自宗法不修世次失攷輯譜者景響  
門閥傳會纓冕獻不足徵文溢其實繁而鮮當僭且益誣  
若夫謹慎之士勿聽無稽凡所褒揚必覈徽典而墜簡已

散家乘闕如史官軼而勿采故老言之莫詳遂令潛德長  
韜含華罔曜其爲悼快又何如也今張氏自畱侯以降不  
疑典高襲爵通侯儷許史之榮伴袁楊之望唐宋以來千  
有餘載雄圖贊務膺文武簡畀者若而人高棲厲行立人  
倫師表者若而人或鳴玉南宮或擬金北陸或存神養餽  
如臺孝威或勤處隱約學矯仲彥罔不據事以書考行以  
實浮夸之誚闕畧之嫌質之斯諳庶免此弊遠可資史傳  
之考證近亦備邑志之搜采不僅以一家之書一書之傳  
爲青陽氏裔誌幸也余故樂從而序之邦鎮行誼諄慤有  
古君子風入都赴京兆試文譽振起厥宗之興其未有艾  
乎

李曉潭竹湖山館古泉拓本序

夫以鑿精馮翊峴山瑩珠彈之輝博擅歐陽潁州出翠巖之秘粹所好者不脛善走類爲招者無翼能飛矧復周幣九府漢官三品巾箱儲黃雀之銜甕鬯貫黑龍之索絢赤仄於水衡曜紺文於銅扇續道元而作論嗤夷甫之不言澤古醺心耽學頤志將以研翫新獲攷證曩聞奚必入南康之郡市庀爭誇遊玉壘之川棧臺高築乎吳門李子曉潭華胄揚芬藝圃振藻綜彥遠之閎識集德甫之秘錄博摻吉金精覈古貝同和嶠之癖則古衷自摠學劉寵之選乃多文爲富叢其纂述炳焉爛焉蓋自昊棘制漚義文字蝕了旁斜畫山下安中金李張董踵謬沿訛么幼差弟亂

真襍贗封演已軼全書洪遵適滋疑義遂令尚金當埒詢  
梁幣而闕如大布橫干混黃刀而莫辨甚至漢興昧李壽  
之編年大平疑馮洪之私鑄則是弄兇雞之野遑問園泉  
投飲馬之橋概稱榆莢凡諸滲漏急藉訂釐君乃金心在  
中銀手同貫平陽安陽庀陽別其源流馬排人排水排審  
其功用權衡銖兩鉤勒分隸遠肇邃皇近迄勝代由正統  
降及閏位則綱目之筆瞭若指掌也從中土旁及外域則  
輿地之圖燦如列宿也擬諸捫星辨尺驗鐸編鐘摩蘚搜  
碑剜箔讀碣閱雅之目殆庶幾焉或謂藏鏹有神點金無  
術給尉遲紙帖必求金甲真人訪文本山亭難遇上清童  
子而僅軸題紫標形模白撰匪河間之工數類綦母之徒

行得無鮫文妬紅鷺眼蝕翠蚨點血而不化蜨生翅而善  
飛徒饜饜古之心奚當療貧之術然而積竿緝於金屋則  
錦匣之裝不若花徑之斃也供翫索於緝繩則寶庫之充  
不敵緇囊之富也羅列千禩照燭九垓坡君圖譜與僕同  
嗜摹拓則尤擅精審詮解則互有發明梨棗待鐫藝林快  
觀若逢武子勿以阿堵爲憎嫌倘遇鄱陽將撫陳編而愧  
慙

練川七生圖序

練祁塘縣屬婁曲盤盪瀛壖澄渟百里水木明瑟是惟英  
淑所儲稽述作之窟藪也傑彥偉儒接踵累代近自吾師  
錢竹汀先生以兩漢儒林爲一鄉耆宿海內之士聽采風  
聲仰德不暇言漢學者必宗練川邑中後進克廣術業宏  
材旣劭俊譽益隆若七生者皆其選也懿夫春華薊苳無  
百尋之茂蔭則其垂條也不繁秋實馨烈匪千歲之靈根  
則其吐穎也易萎是以羣峯窈窕喬嶽之秀所分列壑奔  
騰滄溟之瀾不竭層冰之凜則積水之始基也專門之業  
則名家之軌範也司馬談遷班氏彪固研史之徽著矣伏  
推理湛桓號榮郁析經之典彰矣淑爽西豪里名高陽瓊

實雕龍世禪亭伯藝苑紹乃弓冶書林廓其堂構矣况復  
馬扶風之席盧鄭皆通儒蕭穎士之門尹柳僉才彥豈第  
擅出藍之異才羣夸李謚問太元之奇字共羨侯芭故其  
沐浴庭誥稟守師承駿整蘭筋抗招搖之星旆鴻揮勁翮  
耀神景於雲蜺敦履璞沈不飾乎偽行吐飲翰蒸不侈夫  
浮華言乎其學則疏證典憲膏腴德義匪直逞辯說撫訓  
故以扇夫談資鞣厥奧旨也言乎其文則激揚雅訓彰宣  
事實匪直襲形模工比類以局於陳迹放於詭辭也人如  
建安樹應劉之盟壇友同竹林匪阮嵇之曠放藜牀相對  
茶竈爲鄰比李膺之遇林宗如周黨之過閔子其或雪泥  
少淹河梁暫別落痕春淺蘋花秋早風雨一心關山千里

陸士衡有赴洛之吟謝子暉有新亭之什莫不醇聽互勗  
古瞻並照惟期白水共此盟心雖隔青山無殊會面已異  
日連茹甲乙淑問休闢翮其遐舉爲時之冠則攀龍鱗附  
鳳翼奮袂以升及爾如貫固七生之志也然亦有命焉倘  
其少翁已貴而子陽未顯巨卿牧伯而仲山隱淪則昔年  
維社車笠重逢古劍延津雲龍復合其達也奚加其窮也  
奚損其在上奚喜其在下奚憂著述之事相輝於今古雲  
霞之契不判乎升沈此又存乎七生之自命而不佞之所  
私自箴勗者也余之蕪陋近益積朽鍛羽之禽難漸儀於  
達路埋沙之鏃猶銜想於青萍綴此序言弁諸圖幀損辱  
嘉命不任慙歎願已循涯實深塵忝爾七生者葛鐵生其

仁徐桓生述虔黃雲生穆生陳恬生瑒毛生甫嶽生錢竹  
生師康莊桐生爾保余與七生欽遲積懔鐵生家居過從  
頗密桓生都下尤友善云

黃香鐵江天永慕圖序

聞之行役慎旃猶來無棄人生惟別黯然消魂何況桃柳  
嶺岫終身銜恤之天楊柳秦淮千古傷心之地吾友香鐵  
黃子當蘭成射策之年懷終軍棄繻之志孤颿瘴海匹馬  
巖關遊子辭家高堂叙別已躡蘇秦之屨重牽溫嶠之裾  
難忍愛而割慈爲灑泣而送遠繫驂建業鼓柂秣陵歲在  
屠維月逢重九佳節思親之候愛子分手之辰青衫躑躅  
而北行白髮飄蕭而南返遲尺素則愁共迴腸訂歸艫則  
言猶在耳豈料芙蓉秋豔纔成半面之粧榆柳春寒已改  
一年之燧麻衣雨濕鐵羽雲積戴星而奔呼天莫掇築廬  
誓墓負土成塋問江上之青山慘天涯之落日模糊淚墨

嗚咽寒潮白楊蕭蕭青楓瑟瑟笛步則鷺影三分板橋則  
鴉羣千點鳳皇臺上草何事而恒枯烏衣巷口花何爲而  
欲泣覽斯圖也有不泣然以悲淒然欲絕者伊何人哉然  
吾爲黃子痛而更爲黃子慰者使其息偃家衙局促園廬  
逐麋鹿而居謝朓骸之迹藉一邱一壑以娛心假中隱小  
隱以傲物徒高養志之名終昧顯親之實是謂守雌殊慚  
胎翼又或飛蓬歷亂浮梗漂流負米不歸印泥少迹繞朝  
有策而莫贈聲子無荆而可班是謂浪遊徒乖色養今黃  
子裹白袍而上書燒紅燭而研典囊雖已脫其穎匣劍更  
淬其鋒而又贈僑獻札餞趙享韓華譽動於公卿榮聲起  
於門閥呼爲名父之子推爲後起之秀將使鶯花十載重

尋笠屐之遊金粉六朝硬擅文章之麗爲湖投書渚畔麾  
扇渡頭鯉可言詩驥能馳譽雖傷舊夢之非不灑新亭之  
淚魂而有知含睇宜笑固其所也獨是蘭笙之什待補於  
詩人風木之悲不忘乎孝子迢迢遠道湛湛長江恤乎湫  
乎夜半烏啼之曲松耶栢耶雲間鶴唳之聲惟鳳毛之不  
墜君其長誦乎清芬嘆馬鬣之已荒我亦同深夫哀感

雪夜集大庾相國海澱園居序

瓊樓百尺玉皇案吏之居珠樹千林瑤圃棲真之宅平沙  
積岍春禽不飛層冰在川凍鱗潛伏雲霧霧兮陰濃花霏  
霏兮寒重

六飛之莅稅于農郊三白之占歲其大有時則大庾相國  
戴公行隨

輦蹕香近鑪煙恭和

宸章渥承

褒語迺於退直之暇徧集賓僚晝日接三筵開燕九賡周  
雅南山之篇奏楚客郢中之曲傾湘吳醇酎之樽羅山膚  
薄肴之饌俄而急晷森逝華鐙高張崇臺列壁雕甍連瑤

帷幔流暉廊廡凝曜牕待月以承橫簾垂波而曳練庭鷗  
舞翮梁燕啄素檻落銀河屏橫玉柱花房清闕頻催魚鑰  
之聲網戶高寒恍聽霓裳之曲朱顏旣配樂飲胥暢投分  
披懷贈詩見志維公燮和台曜宏長風流高人何點成其  
翹秀之才徵士劉虬勗以丹青之價羣彥慕響各盡所用  
而某更有進焉者發來思之詠宜憫勞人歌集霰之章無  
荒好樂庶幾協氣所召時序不愆盈尺之祥

天顏有喜躋堂稱觥燕笑譽處奚僅侈相如之翰藻誇鄒  
枚之妍秘已也公曰善乃爲文以序之

翁覃溪學士蘇齋賞菊詩序

井梧翠凋砌蘚綠暗小雨忽至疎花轉嬌蘇齋主人引壺  
觴以侑酒集賓僚而賦詩俊彥景從勝儔雲集蕭該何妥  
同濡軌於金臺王褒庾信並騁妍於詞社笱鞵桐帽栗杖  
蘿筇倚檻而吟傍籬而坐遙山一角青入蘼蕪曲池兩岫  
煙生荻葦團欒十笏似丈人農隱之居圍抱千花極高士  
幽棲之勝三升酒盡四座興酣翰墨助其妍華情瀾浮乎  
澗渙儲其衆妙彙爲一編傳來玳瑁之牋盥以薔薇之露  
共進延齡之祝請爲學士奉觴願貞晚節之香無使寒花  
笑我

粵東七子詩序

神山四百二十峯形軒玉墀飄忽隱見傳自太古之世浮  
來南海雲霧變幻風雨離台靈淑之氣縣亘二千餘里其  
中淵彥窟藪鱗翼蒼蔚自曲江名相肇始正聲至南園  
十先生暨海雪獨漉溱湮六瑩而臻極盛近則魚山太史  
與張黃黎呂先後接軫今且風氣日上吐納菁華陵轍前  
古於是海內才彥長安士大夫論著作者交推嶺南憶自  
金臺旅邸縞紵贈會惠我前綏勗以光彩尊空晨座燈燼  
夜几朱絃一曲不濫盈庭之竽長劍十年思爲知己之贈  
觴詠之樂聞者豔之無何握手一別填膺百憂纏繞今昔  
彌益喟嘆迹疏意通期賒道密每稔舊侶如挹冲抱爰檢

篋衍錄序所作列爲七子編成六卷驪珠徑寸豹管一斑  
雖瑤英之璫璨金華之晃曜珍翫什襲靡得而踰焉七子  
者陽春譚農部敬昭吳川林孝廉聯桂順德吳大令梯黃  
侍御玉衡番禺張進士維屏香山黃明經培芳鎮平黃孝  
廉釗序之者鎮洋盛大士也

陸萊臧詩集序

橫雲虹跨秋嵐之霞氣千門圓泖練澄春浦之瀾光一碧  
樓聳拄頰亭開醉眠凡水木之明瑟林壑之清淑詩人得  
之以攄寫胸臆激盪性靈是故文章之府地脈顯其珍闕  
江山之勝才彥萃爲淵藪青浦陸子萊臧生水雲之鄉挺  
神仙之骨當夫奈山山齋梧溪溪暖桂閣閣高雪軒軒敞  
月娥誇其晏娛山靈助其嘯呼猿驚雁落擎霄掣解之思  
玉笑兩啼鏤碧瑤朱之字萊臧以庚午鄉薦再赴公車甲  
戌之春與余定交都下見其英姿方蔚逸趣橫溢同人習  
制舉工帖括者勤刺股之揣摩問畫眉之深淺談風尚則  
刺刺不少休倖聲華輒欣欣其自得更有湛樂酒食徵逐

游戲懶抱兔園之冊樂觀魚里之優又或晨趨金張夕謁  
許史懷中之刺向高門而濫投馬足之塵望朱輪而下拜  
風斯下矣陋如之何君獨泊乎寡營翛然絕遠常倚日暮  
之竹不變踰淮之橘故其爲詩也清飈泠然惟列子之能  
御冰雪在抱匪元規之能汗迺者易吳趨之調爲燕筑之  
歌以南士與乎會盟使北里辨夫寒暑於是雲間士衡之  
作有并州越石之氣滹沱河畔關雲擁而峯高勅勒聲中  
笳吹起而霜冷時則京營貔虎甫唱凱旋河朔鯨鯢尚虞  
鋌險讀杜陵諸將之篇擬吏部元和之頌往往酒酣拔劍  
斫地悲歌夜半聞雞披衣起舞壯士爲之動容書生因而  
投筆然而人非燕相市骨者空慕黃金賦擅梁園騁妍者

反嗤白戰未免哀蟬落葉泉咽玉河羸驂控鞭塵飛珠市  
春明之夢初醒故園之花無恙清風一席飛霞半帆盪東  
吳之畫橈結西冷之吟侶一昔之酒對盞並其嘯歌一篇  
之出雙情緯其緜暖墜歡同拾近製出觀百讀百思載服  
載翫愧懵識之照隅聊綴蕪以傾悻獨秀擅江東之望旣  
傾倒乎謝莊相知定異日之文敢以屬諸敬禮覽斯擊言  
共締岑契當更續周雅嚶鳴之章願無忘衛風木瓜之義  
也

淮上唱酬詩序

余息影射陽羈迹冷宦樗散瓠落絕意進取惟吟咏之事  
鏗而弗舍幸此間人士不見擯棄相得甚歡余性懶散不  
好詣人息柴桑之廬絕少車馬避元規之塵恥爲襜褕獨  
於詩酒之會每一招攜欣然命駕軒棲堞影檐禽下而呼  
羣嵐涌鉢池山花紛其笑容或一盤苜蓿半壺濁酒開徑  
揖客惠然肯來流連竹石之間舞詠雲霞之契閒鱗戲沼  
愜靜契於川梁候雁銜雲入秋心於平楚時則有若朱君  
紆邱君彤郝君其燮李君續香友香樂數晨夕不辨賓主  
適鐵嶺達君麟通州成君儁宿遷陸君從星同客淮上鄭  
僑吳札迭主敦盤分牋擊鉢各出秀句一篇甫出合座傳

觀一字之疑互相商榷兒子微瑱隨侍至淮諸君以爲可  
與言詩許陪末座余亦顧而樂之一載以來言必諧聲唱  
乃衆和因錄所作付諸梓人以志鴻爪嗟乎伐木之契吾  
人所同搏沙之感他日請念留此一編以供三復相與藉  
文章爲賞心不僅作雲煙之過眼已也

葵花樓詩鈔序

夫以冷夔妙律匪濫奏於筮簧夷且冶容不逞妍乎金粉  
叩徵叩角抗墜協於自然乍陰乍陽神光儵其萬變是皆  
夏風泉以振響曳雲霞而作佩迺克曠如軼俗翮其絕羣  
文章之道如操音然飛聲激塵繁絢促柱非其至也如選  
色然姣人流眇華袿麗藻非其至也在心爲志發言爲詩  
亮有真宰詎容僞襲程君與九性秉慧邁蕤嬋羣雅宏成  
與石景純傳豪荆峯之玉連城渙水之瀾千尺然而啟中  
黃之少宮則采菱陽阿聞而掩縵挹仙姿於姑射則靡顏  
膩理見而怍容其視繁會迭唱左竽右瑟十眉競鬪盛采  
絳服者貞淫雅鄭蓋判然矣淮陰郡城水陸之會冠蓋相

望與九閉門卻軌衰書兀坐寒檠倚雪暑艸搜螢琴歌則  
夜分不輟文酒則客至不速謫陋如僕迺貞交契感分識  
歸推心敘款余語與九古人千載孰踐厥軌勉圖令名是  
在吾子與九語余名山之業勿謀胡成過情之譽讓而勿  
爭同心之言相視而笑出所箸詩無慚作者特其菁英薈  
粹富有卷帙所刪存者什僅二三耳理美是握以物罕而  
倍珍澄汰必嚴曰吾斯之未信深藏若虛集益愈廣緬彼  
時流末由等量棗花樓者與九讀書吟眺之地勝情所寄  
詩境肖之鉏花待雨聽鳥知春煙重寒輕簾疏香密雲屏  
一角聽瑤瑟之未停月痕半規恍明眸之善睽洞庭張樂  
激揚金石之音洛濱弄珠窈窕天人之致嗟余慚昧微識

端倪譬猶過北里以調箏對南威而窺鏡而聲由情感倚  
歌輒和子非我面相告以心十誦莫罄數言是綴願作雲  
龍之逐竊有幸於今茲重尋水鷗之盟期無負於他日爾

徐秋士詩集序

吾婁風雅胚胎宋元甄育明代雄州肇建鴻才鬲興逮自  
聖朝沐浴昌化鳥弈絲遠諸家譔著麟然炳然方今英俊  
接軌喆彥步武殊狀同體日新月異徐秋士孝廉以太僕  
之裔累世其昌賢書之升一戰而霸臚辰侗儻壯志卓邁  
安陸文彊少以名聞郡國安平子瑋學成而遊京師小廬  
峰館集臚列衆體奄擅羣美章峩之岡璀璨瑤碧夫餘之  
珠錯落酸棗瑟琴鏗其古音敲彝賁爾柔色要皆竦身順  
止繩墨不跌用能旌性制佩璫枝綺華或崔巍切雲或陸  
離長鈇或媵容修態或靡顏膩理時而歡愉恬逸爲繁英  
爲茂榦爲春禽棲巖爲秋鳧浴沼左笙右管前宮後商樂

酒之夕長生未央時而悲壯激越爲宵笳爲曉角爲馬嘶  
長城爲雕盤絕嶠沙雪壓岍河水塞川鐵鳴金動奔猱墜  
鷲若其吐飲沆漑濟滄瀝液則十洲閩苑水清雲淺碧霄  
路近鈞琅聲遠又或山川湛鬱感弔今昔則金啼玉泣風  
月騷屑折碑石人莽穢榛沒嶢嶢焉其凌厲也飄飄焉其  
超舉也決乎滂乎而莫涉其津涘也君方齟齬余始摻祛  
蹤跡之密於今數年長安人海迺才彥所駟羅聲華之結  
轆曼倩執戟見者嘲之仲華拜袞聞而繩之君則風軌軼  
俗潔修秉素鴻羽可用鷗盟不寒末學之弊從風而靡耆  
甘忌辛好丹非素君則泊乎其衷淵乎其量師商叩商斷  
竹續竹容納孔廣鑿藻彌審繇以植根固蒂抽英發條言

觀麗則永監淫費景企正始垂輝千春莊誠廉直之旨暢  
狄成滌濫之音息百數十年鄉邦文獻踵而興者君之述  
作其庶幾乎紬討斯集麤領涯畧忘其憊憤而綴以蕪語  
讀君詩者當不以余言爲蚩鄙也

蘭素女史繡餘吟課序

蘭素女史姓趙氏名德珍湖州德清人余同歲生平湖楊  
君蘋香之室所著得月樓存藁凡十集其首集爲繡餘吟  
課平湖縣志載其卷目縹囊積綺形珥播芬雖瓊簫之奏  
祇應碧玉爲緣而繡軸之香不與紫煙俱化原其德門詩  
禮華胄影纓系溯鷗波里名松雪藐姑射之前身萼綠華  
之再世玉榮之泉沁其神骨都梁之馥溢於襟裊通仙心  
於詩心以靜女作才女麝雲四壁月皦宜秋花霧一簾香  
寒不落賤勻黛墨燭燦粧粲嫗解排籤婢嫺捧研蘇蕙倩  
其扶輪左芬覽而斂衽矧復王孫南國鳥弈清芬夫壻盈  
川頡頏才望碧紗籠畔之蘭英駢枝駢穗朱鳥牕中之燕

子雙宿雙飛遂令如皋一笑則珩佩助其清娛房吹三終  
則翹簧申其賡籟方期倡隨之樂百年與偕試問文字之  
緣幾生修到何乃玫砧煙鎖薇帳風淒么絃紅玉續命無  
絲小篆綠緜畱痕未蝕蘋香悼瑤光之韜彩集錦段以分  
編惠示佩縷縷陳涯畧謂風前柳絮難縮吟魂而山上蘼  
蕪每縈舊夢况乎證蘭因於花譜則殘箋之什襲同於金  
鈴之護持編璫琲於縞繩則茗琬之銘馨勝於倖錢之營  
莫於焉裝之寶軸麗以琅函奉倩端憂之夕鴛錦香銷安  
仁永逝之篇鮫綃淚染梓人將命開雕藝林廣徵題詠聞  
之慧難兼福則玉京路杳幻境非真情以生文則楚些詞  
哀感人易入是以彩雲化去悟鏡花水月之皆空離恨傳

來歷地久天長而無盡也僕也苦岑舊契車笠新盟代孫  
楚以寫愁愧徐陵之製序握研思焚買絲合繡叩僊韶於  
華鬢天上傾耳疑聞珊佩之音招靈巫於玉塵峰頭綴詞  
聊當傳芭之舞

婁縣葉紉蘭校

與張椒卿書

別集三

某白椒卿足下別來書問間隔自春徂夏思子爲勞想同  
之也浙西之行僕本不欲久淹屬有書院校文之役甫及  
歲事旋應秀水之招渺爾歸帆動輒多阻昨得孫少初書  
畧悉足下近况尙湖酒人興復不淺斜陽吾谷朱顏半酡  
古澗石梅綠痕四繞臨風神往翹首色飛然而下走之懷  
亮茲蚩鄙敢援周書德將之義用獻鸞侯初筵之箴足下  
其審管之昔嵇叔夜學養生之術濁酒一杯重增其放然  
聞阮嗣宗飲酒過差每用規切此亦愛友之深心苦口之  
上藥矣劉伯倫指入荒爲庭衢笑二豪如蜾蠃例乎齋物  
則甚達言乎攝生則甚舛况足下肝疾時作外疆中乾酒

丁年過半而弗飲不輟甘築糟邱以老竟思荷鍤以埋其  
不可者一也夫酒者就也就人性之善惡或曰造也乃吉  
凶所緣起雖太真擊憤陰彌讒害而灌夫罵座終誓令儀  
足下有思柔之美無伐德之恥偶爾沈頓不改溫愉定國  
數石康成一斛言言斯禮油油如也然而據鞍不盡延之  
列坐豈皆陶侃多鄙陽之暴謔少周黨之清談或摘扶隱  
伏以訐爲直或駁辯文章露才揚己童殺易出乾餼有愆  
往歲西城山館旬日浮觴猥瑣之徒哆口詆謗過而不改  
尤而相效小懲大誡於義何居其不可者二也漢書惟濁  
酒可下離騷必痛飲而讀他如白之詩狂旭之草聖類皆  
淋漓醉墨噴涌吻泉築樓天津之橋傾瓢瀟灑之水飛豪

興於尊前出秀句於杯底大得孟嘉之趣何礙次公之狂  
今足下憑几籠袖手無停筆磨墨引被腹已就藁何以杯  
杓在前著作遂廢醒時之文與枚生鬪捷醉後之作視長  
卿更遲甚至元花草創自取覆瓿殘簡蠹蝕倦而度閣惜  
江文通之花管委王無功之醉鄉其不可者三也伊昔建  
安之朝章武之世每以年饑並嚴酒禁彼孔融之書簡雍  
之諫所以示爲政大體不苛細務也竊謂豐年報賽雖周  
禮其猶醪而洗腆用酒非殷人之崇飲今吾鄉哀嗷之雁  
集于中野而足下束脩之羊僅供半菽乃艱難覓杖頭之  
錢跌宕攜高陽之侶無金貂之可換惟葛巾以自隨吾恐  
同人始亨而終吝旅人先笑而後號日計不足後悔何及

其不可者四也凡此四者有一於此可爲戒心慎勿逆耳  
若欲縱八斗二參之醉以爲樂援百觚千鍾之論以相難  
則僕亦流連酒場懽戀文讌者而豈漫爲此矯枉之說以  
瀆足下之聽哉范泰之戒傷生高允之譏敗德邴原之憂  
廢業陳暄之傲覆舟前規具在盍取裁焉賓朋之集客中  
頗佳穆生雖不善飲而醴酒常設捧巵承槽聊以遣悶適  
興而已放鶴之亭呼猿之洞吟屐所憩勝情不衰虞山婁  
水故人無恙晨暮相見代致寤懷穀雨陰沈眠餐珍重蕪  
詞翫縷書不盡言

與湖州趙季由太守書

僕聞賢太守之名久矣湖山在望夢見顏色何幸清光燭照幽寂近以郡試備襄校讎旬月款聚頓展隆想墨妙亭荒愛山臺古昔賢遺蹟零落殆盡及晤執事如對古人匪直爲政風流典型大雅也憐才之心迫於飢渴欲單寒之儒得廣廈之庇雖力有不逮而心無弗周求諸往詰亮所罕有矧彼時流末由等量別後塵事刺促賤翰致疎適友人張椒卿來遊吳興特裁短札言叙離悵椒卿於執事附同岑之契濶別二十餘載其人負異才有文行乃洊遭閔凶孤危病苦性又耿介落落寡合聞執事膽照若月義高於雲思欲借一枝之棲求三年之艾伏惟執事畱心物色

延覽英俊凡受品題俱經拂擢况其爲故人車笠良朋風  
雨有不歡若平生而願言覲止者哉夫結朋協好千里一  
心惟其膠漆相投故無雲泥之隔今世有王子陽孔仲山  
其人而少翁巨卿白頭如新是可賀也六客之堂復開三  
影之詞待續好音惠我臨書眷然

答徐桓生書

桓生足下客歲辱賜書知足下遠客塞上及入居庸關復  
寓畿南僕北上時道經鄭州而失之交臂是用悵邑惘焉  
若醒丙子京兆秋試足下俛得復失夫倘成倘敗關時命  
之通塞一臧一否隨有司之愛憎卒之藏珠於淵潛璞於  
石光采所儲幽裔自燭其內蘊者有所樹立其外襲者無  
足軒輊也僕十年之中四上春官蹉跎壯心銷耗英氣卽  
鹿往吝愧君子之見幾歸妹征凶嘆承筐之无實然有夔  
曠之律乃可以和於鈞籟有干鑠之銳乃可以議於斷割  
昔人不患名之不顯而患德之不榮不恥祿之不及而恥  
智之不博故與其羨而不臻曷若偃而不思也與其貼身

以微曷若遜志而敏也人生在勤不索胡獲今僕五十之年忽焉將至不惟前詰典文精踈殊會支派所別淵源誰激卽繡鞞之餘雕蟲之習猶不克動其情志載諸篇辭足下英年妙譽卓絕流品努力自愛不朽之業非子奚屬夫棲托翰素賢於圭組之華廡寂寥舊葦勝於長衢之輪蓋所恨望道未見徂年如流此季重所以慮深於時邁茂先所以勉志於德聲也嗟乎桓生與子相期如是而已任邱密邇畿輔賁然來思勿吝金玉惟日夕望之

貽虞山友人書

虞山北枕大江東，瀕滄澗，星壇宵竒，真靈棲息之區，石磴  
激滄雲，水清華之宅，僕十餘年間，偕二三君子讀書其中，  
真宰共訴元契，同洽絕塵，離垢曠如，浩如山鳥，依人嶺雲，  
贈客杉叢，鬱萃陂岡，邈迤平坦之磴，時露峭容，咫尺之阜，  
乃工遠勢，秋霜絢樹，傳畫本于楓林，天風步虛，得琴意于  
松杪，鶴峯竦峙而蔚蒼，龍澗盤屈而蜿蜒，帝子臺高，巫咸  
祠古，豐碑蝕蘚，齊梁花草之香山，鬼招魂，屈宋風騷之筆，  
夫山川登陟，足移性情，矧吾人詠歌爰洽，朋好昔之勝侶，  
雲集高情，颺舉相與，調鬯襟素，揮灑煙墨，拂簷之瀑，研不  
滌而自潤，入座之月，燈方殘而愈明，倚竹瘦吟衣，流寒翠

鉏花答語氣噓煙霞當此之時倘使買山有貲因樹爲屋  
長此偃仰以娛歲月此固極良人之古懽得幽棲之至樂  
者矣何圖塵事刺促風雨錯互陸機赴洛佇立而望故鄉  
王粲之荆信美而非吾土遂使猿驚鶴怨遊子去兮不歸  
水驛山程關河杳其修阻離逃之感歷載于茲景光迭更  
瑤華莫嗣雖獨居蕭寂致乏切磋而文字述作未除結習  
諸君子倘不我嗤鄙正宜曲借良訊勵其令猷不得謂揭  
車杜若只宜與山中人闕此芳馨也昆湖水碧方舟溯洄  
劍門嵐青支笻睇眄曩者左思招隱曾期瑩此寒泉他年  
張翰言歸竊願盟夫息壤

興譚韶九書

韶九足下二載之別尺書未通張子德方至京述知近狀稍慰積裏南中秋賦佇望好音明珠館陶出而照乘祥金陽邁靡不躍冶然而身世之顯晦時命之通塞下土搜情而忻戚俗流附耳爲榮辱而僕所望於足下者不在此也昔鉅鹿孟敏潁川庾乘俱以諸生力學不應徵辟劉淑舉賢良而辭疾檀敷遷議郎而棄官雖其榮華邱壑甘足枯槁不無矯枉之嫌何損振俗之軌近世之士要能釣利牽物志流庸知弋取之譽所榮在一時不朽之業所爭者千古昔之結交賢俊千里一心或關山之隔願見顏色或風雨之夕恍親晤語所期許者文章所諄勗者道義也若乃

塵纓鞵縛世網倥傯擬劉峻辨命之論則氣喪志沮讀楊  
興薦士之書則眉軒神聳遂乃涉躁競之路遠希靜之塗  
潢潦之濁冽泉不能漑幽室之闇庭燎不及燭此蓋未學  
之積退而大雅所蚩鄙矣足下苦志厲學悅心研典搜藏  
山之秘寶輯刊石之遐貫遂義囊括雅言份郁百家恣其  
騰躍三冬富於文史唯不懈乎推檢亦自敏夫改作亮克  
籍據前修備成箸錄劭宏材於往昔立修名於來茲區區  
之念與子相期寤歌勿諉晦明無間如是而已長安冠蓋  
之場非窮士息游之地迺喪其資斧曷月還歸南望江天  
積裹成海近益厭棄人事閉門謝客孤燈閒寂哀輯舊藁  
旋里之日出示同志辯析訛舛賴有吾子昔敬禮作文子

建潤飾畏後世之嗤呼良友之助亦古人之通義也僕喜  
作詩茫無心得惟癸酉距今五年以來用心愈苦風格稍  
進自視少作俱不足存年不我與彌自惋惜近頗掣翫小  
學愛許氏二徐之書吟詠之事不可復兼遂爾暫輟爾來  
足下奚所肄習詩法奚所崇尚鄴程獲便佇惠德音勉愛  
景光隨時努力懸心遲仰不任依依大士白

與畢文季瑜書

季瑜先生閣下風雨索居涼燠改序驛樹在望賓鴻不歸  
千里契濶昔賢愴懷况如僕者工愁半生繁憂百結鄉關  
蕭瑟親知寂寥每念先生年忘張陸交附紀羣伊昔龐公  
德操望衡對宇歡情休暢然而居漢之陰有俟寒裳宅洲  
之陽終需命權孰若偃仄並巷南北數武室釀將熟各聞  
甕香壁琴乍張互答窻籟譬猶燕飛上下栖於一木苔痕  
淺深附于一石疇咎之樂曷其有極而乃執手一别于今  
三年滄江逸叟優游醉吟之鄉淮浦閒身局促譚經之席  
良儔既析勝情莫助雖劉伶臺畔杜康橋邊酒人高會不  
以謔浪爲嫌狂客悲歌大有風雲之氣而光塵左顧時動

高軒平路伊阻輒懷舊雨矧當秋露已白木葉欲紅蕭晨  
黯黯恍若有失修夜漫漫倏其不暘聽颼嘖之激楚眺煙  
霜之凄迷偶影獨遊所思不見羈宦索莫歲月衰遲甚矣  
悲哉此之爲別也去歲辱賜書勗以及時努力復整長轡  
學蘇季之十上療張衡之四愁長者愛我苦言如藥夫狎  
霄逸翮絕塵上駟貴及壯華賁此英采今則劍非歐冶又  
經屢挫之餘璞殊荆人復抱見刑之慘是宜銷鋒窮咎錐  
迹幽蹊雖蹈守真之譏無損歸真之義曩於京師亦嘗忘  
其闖陋揚厲聲華琨迓羨其激昂王貢深其標許而壯不  
如人事過知悔茲且華髮凋謝術業荒落負贈縞之季札  
類視陰之趙孟追維舊日美志不遂流光若駛奚可攀援

惟有棲遲下仕叨竊薄祿講授之暇或有造述藉以自娛  
如是而已先生含懷邈遠秉志澄澹忘高門之鼎貴樂考  
槃之寤歌曠邁不羣高簡適性絕意榮利殫精書史亮哉  
離世之垢濁而執古之醇聽者也吾鄉故人自先生外厚  
夫甘亭夙稱同志厚夫以病解組甘亭遽歸道山零落之  
感彼此同之南望於邑作書叙懷惟先生珍護道體享保  
黃髮握管企望不盡所云

答蕭梅生書

梅生執事秋江餞別風雨寤懷春初賜書未卽裁報一載之內病愁交迫沈鬱彌襟况兮若失渺焉寡侶不遇叔向誰知駿茂之心每思鄭僑欲贈季札之帶遠莫致也我勞如何三復來教盛誇壯遊擊汰揚舡騰觚執解每聞霞唱便帶瀛聲乍想雲衣輒通香氣當夫嶺樹消雪溪花媚春野鷗狎人山猿睇客賓僚皆杞梓之材敦槃盡珠玉之美此其爲樂曷有量乎足下自離吳會首爲越吟遂出射襄之城渡羅刹之江登富春之山涉嚴陵之瀨峰色清峭水光澗泓維我與子遊屐所至先後數年追維曩蹟歷歷在目而賤子挂帆之地乃足下發軔之初遂爾清嘯凌風道

遙汗湧雄關庾嶺之奇峽石澗陽之險銳岑巋立絕壑通  
幽濤淙汎瀆散髮空青雲霧噓喻照眉純綠當斯時也洪  
崖拍肩盧敖傾蓋千羣紫蝶迂紺佩而下星駟十丈紅棉  
俯媧宮而迴曼睪飛棕莫過高談轉清以此傲人實堪羨  
爾視彼滄江故人淮陰羈宦戡日暮之倦羽作車中之新  
婦其爲悒快更何如也然而羅浮粵嶽曾托夢遊白雲簾  
泉率多瑩侶昔之珠樹三秀同見賞於蘇齋今且錦雲七  
襄峙編成於江表翁覃溪先生曾輯粵東三子詩  
今余又新彙粵東七子詩選安期仙  
觀翹首鸞鳳之騷祝融神竝移情水天之奏僕之舊雨子  
之新知經歲經年相思相望別恨萬里愁感百結榻陽之  
賦激楚河梁之詩嗚咽况復枯桑攬風寒蘿挂月蕭寥含

辛標擗茹嘆剔銀缸而不寐掩金徽而罷彈離索之感昔  
人所悲僕獨何心能無倦倦所幸士龍雋望恒接笑言穎  
士髯奴慣馳箋素石梁詞客錫山寓公文酒之集頗洽情  
款撥悶蠲忿如是而已鷓風南飛手此以報炎州節候珍  
攝惟宜近詩數章並附采覽惟足下正之

與潘彥輔書

孟秋月杪接奉來訊知足下以胃病止飲卽占勿藥伏惟  
寢興綏劭君子攸宜今春寒氣太甚積雪壓岍堅冰塞川  
僕體故羸猝感寒疾胸次癥結神色滯鬱綿延十餘日不  
瘳得足下書頓祛首疾書中長言覲縷共證素心孳哉憚  
悅周覽忘勅特以蕭菲之植遂殊荃蕙涓流之水不生波  
瀾大慮空聲冒孤負褒勗嘿坐寤思益滋惶悚曩者致  
書左右竊附盍各言志之義敢竭就正有道之誠自以性  
尚膠固有味通方動與時賢輒相水火此亦狹量之不廣  
而褊心所貽刺也且僕旣不能削跡家衙散髮湖海依巖  
爲廬鑿坏爲室比楊倫之不出學張犖之杜門而徒高語

介特妄設城府以此身世方之古人觀行聽言適相扞格  
獨居省過是用疚心迺蒙惠訓再三義存引進在昔邴春  
厲操王偉元戒其不成彥方秉義陳太邱作之師表不僅  
識趣之合抑亦有箴規之助焉覽所示詩瀟灑宕逸擅美  
推能允惟大雅勉就報章自同獻笑寢想瑜玉珍襲明珠  
續有所製望更賚之所訂禊遊願言勿負惟當遲此休暇  
清觀乃申或爲塵事羈束則攄寫情懷重煩紙墨春陰如  
醉林花不飛微我無酒撫序興感惟足下珍護眠餐敬最  
光彩不宣

答黃霽青太守書

霽青太守閣下杪秋得所賜書知先生聖廬銜恤輯注古  
經珍重手澤愴感霜露惟以馨旨羹膳侍太夫人潔白之  
養晴檐曝日戀茲春暉曲池迴波流成孝水臨風敬企如  
何可言大士射陽羈跡三載于茲意緒乖違容色顛顛故  
人相遇以文字見譏索居無膠與木石爲伍一瓊微温飢  
鼠恣嚙一鏡瘦映寒蛩欲語僵卧而風霜不知高歌則金  
石若邊竊嘗自念年踰半百荒園苜蓿長此終老惟撫序  
展眺登臨嘯歌因寄所託畧可自怡而已奉寄拙刻惟先  
生惠教之大士頓首

婁縣葉紉蘭校

重修古三茅觀碑

代作

別集四

苔斑十笏清幽羨門之居筠翠數弓瓊瓏羽人之館豈必  
雁浮遐亘銜朝霞於石壁麥積霽峻承夕露於銅梁况復  
繕垣葺宇曲瓊之絙屢新引泉鑿坏酸棗之臺重構吳郡  
西城三茅真君觀宋淳熙年建元明迭有興廢我

朝康熙初道士松陵陸君翫鳩工而鼎新之胥濤送青金  
闔迎綠柳鎖閒雲花霏靈雨縹緲九琳之宮迴翔八瓊之  
宇飾文犀之周廊張紗縠之夏幕華陽虬駕此焉弭節句  
曲螭轡於以憩驂迨自般爾久輟星霜累更棟榦之材不  
施于案悅丹望之飾不勤于垣墉朱闌蝨香雕楹蝕蘚蟻  
蚋銜九秋之花蝴蝶飛三春之艸遂令瑤象晡靄靄旗森

舉迦汪渚以褻裒欵緒風而窈隱雖中黃少宮蓐收變商  
不足迓而侑也楚苗之食安胡之飯不足衍而飫也陸師  
沒後數傳至呂君維馨于乾隆四十年乙未偕道侶楊君  
維新創建雷祖大殿斗尊寶閣越二年丁酉復建文帝閣  
以次落成新宮博敞真苑崇隆星拱列棹玉繩曉巨電飛  
層構金題夜瑩石壇秋灑彈玉笙之清美法筵夜宴流瓊  
蘇之寶香綺井華梁文檄金庀雖非蓬閣之洲卽是靈真  
之館時有金君殿英棲巖結宇耽元信道劄捐別墅重廓  
仙廬呂師復募建山門三楹菩薩寶閣一座于乾隆五十  
七年壬子歲落成規繩百堵膠葛九成踵事每增歷時寢  
備覆一簣而成山掘九畝而爲井遠則躡景凌虛近則鉤

心門角俯則鶴立鷗眠仰則猿吟雁落彤軒丹桂麗七襄  
而爲章帷葉綬花榮四時而不謝峯列三秀拜保生之籙  
閣飛五雲入蔡史之夢蘅薄建旂仙真翩其駢集椒塗迴  
馭靈修憺其忘歸迺爲銘云

景懷呂師道行澄澈移山若愚運甃匪拙恢廓靈境經營  
仙窟僦斤削雲斑斧斲雪壁繞辛車礪通丙穴煑石揖雲  
燒丹抱月千禽攫翼萬萼散纈飛翬如跂斷虹似截翠蓋  
容與素蜺環列碧鸞掃塵玉龍駐節翹企往蹟芳畱蛻骨  
永庇琳宇俾棗銘碣

巢棲碑銘

射陽學舍東偏老屋數椽名一枝巢吳郡鄭公世壽秉鐸  
是邦經始卜築嘉貽載遠令猷鮮嗣歲月緜曖垣墉積圯  
暑雨奔雷繞床聚蛙淒風撼壁隔牖穴鼠竹素封塵琴歌  
輟響揚雄之奇字莫問周黨之清談不聞蓋緇帷之林荒  
榛弗翦琴策之座茂草是鞠者已歷數十稔矣余以印爪  
之鴻作營巢之燕叢篁碍路繚以槿籬空梁墜泥承之油  
幕雲根以苔蘚爲衣屏風以薜蘿爲飾分花待蒔先誅宋  
玉之茅覆簣將成且運陶公之甃於是蘇湖經塾得復舊  
觀檀橋講館會合新侶鍾阿逸客居然吏隱之家雲溪醉  
侯大有幽棲之樂宜貞珉石爰紀歲時職思其居俾無忘

諗銘曰

倦鳥戢翼啄泥治巢以蔽風雨于焉逍遙談經披褐吸泉  
挂瓢鑿坏匪隘近市不囂風將桐引月倩花招客來不速  
我歌且謠樂酒今夕同人于郊吟分籬菊韻落牕蕉幼輿  
邱壑仲蔚蓬蒿十笏容鄰一官繫匏吹笙肄雅盍簪筮爰  
爰居爰處其樂陶陶

杭州兵備道署新築退思居記

嘉慶甲戌仲冬黔陽何茂軒先生自虞山移篆浙西其明年乙亥歲阜人和政清務簡迺于杭州官廨後圃築室數楹自公之暇于焉委蛇攸芋之歌屬諸君子爾其依巖結宇因樹爲屋宗廟不恢其制丹雘不耀其飾陶公三徑玉川數間吟嘯所托畧足徘徊而已豈必雲屏煥爛規月榭以雕甍瓊壁青葱度霞軒而架翼若其枕吳山之鬱崛激西冷之漣漪大觀之臺近眺若接瑞石之洞遠青乍浮泉百道其欲沸山一尖而如笠雜英滿樹啼鳥數聲筆床茶竈如遊甫里之莊紺壁丹梯似俯媧宮之榭卜築旣成宴飲以落公顏之曰退思屬門下士爲文記之夫相在爾室

賢侯矢屋漏之戒計過無憾名卿嚴糾省之條故其盡忠也無恒安處斯其補過也莫或怠違公安交不諂上愛不瀆下文爲德表範爲士則守顏氏貳過之戒勗邁賢寡過之修何慮何思有倫有脊然而統率牧守協贊旬宣倚畀之任隆報稱之心切狂獄未平何以理之良莠不壹何以別之疫癘時作何以劑之寒雨或咨何以鞠之必將使泮宮藻水式瞻旆旂菖葉杏花不愆耕耨大東之謠鮮聞勞止之怨毋作然後樂彼良晨供茲清賞長楊映沼芳枳樹籬修篁蔚蔚俱扇祥風靈果參差並覃澍雨碧雲四壁移綠野之松濁酒一盃割平泉之石不亦可以紓其憂思申其懷抱乎若夫殖貨利以籜身希榮寵以役志彼人是哉匪

我思存更有視陳牒而厭心以吏隱爲藉口慕關門之令  
尹願學稼於老農是猶促鱗游乎汀渟短羽棲乎翳薈所  
徂者近謀而所昧者遠志也是記也敬爾在公職思其居  
凡百君子朝夕從事匪直紀游宦之跡侈眺覽之勝而已  
公以爲然迺勒之石以垂於後云

澹然居記

嘉慶己卯余來射陽時值歲暮寒威逼人興寐不定置書於牕雪消短簷雜以泥淖籠鐙於牖風撼敗壁倏復黧慘離離之蒿積於屋角穀穀之鼠跳於床頭蓋學舍傾圮歷數十年編枳不成牽蘿孰補藎講席於春蕪鞠經帷於秋草甚或毀瓦畫墁僮僕求食析柎折榱樵蘇代爨此則先生充隱惟餘仲蔚之蒿蓬弟子習儀無異叔孫之緜絕也幸有隙地數弓坳堂十笏古樹合抱春榮不彫雜花無名秋晚愈豔徑路幽阻修息惟宜余乃資分鶴俸泥留鴻爪于一枝巢之西偏別構三楹時有郡明經許君愛山鳩工度材審曲面執布置規畫有條不紊經始於辛巳孟秋閱

數十日而落成容膝之室畧足徘徊及肩之牆自絕塵垢  
許君請所以名是居者竊惟鑿坏遜跡期願志於邱樊織  
簾誦書出清歌於金石榮進之心旣積澄澹之懷益遠况  
樂琴書以嘯傲道在葆真絕冠蓋之逢迎官能耐冷是宜  
抱芬芷懷琬瑜慎交游息奔競練味元澹游神虛穆因材  
之訓無斃待叩之鐘必應良晨握簡輕風吹帶草之香清  
夜停琴細雨數簷花之落簾波皺綠研雲流黛遠寺青涵  
平嵐絳淺比鄰鷺鴨奚嫌近市之羈止棘鷓鴣卽是忘憂  
之館爰居爰處寤宿寤歌葢蓬葦之樂藉之以宅身輪奐  
之飾無取乎眩目也新居旣築顏曰澹然爰紀年月以示  
來者

石刻宋賢誥勅像贊跋

道光壬午中春岑川程子與九訪余射陽學舍以石刻宋賢墨蹟遺余卷首誥勅二道一爲孝宗淳熙六年勅授臣張栻爲右文殿修撰階朝奉郎一爲理宗淳祐元年勅周程張朱五臣從祀孔子廟庭又像贊二一爲橫渠先生係朱子撰一爲南軒先生係真西山氏撰并書其跋語則與九自著卷尾復有南軒先生手錄唐小司馬所撰留侯像贊與九亦附跋語按是卷墨蹟係歙人張茂才冕所藏與九壽之樂石以公當世其刊石始末具載跋語中聞之墜簡委筮莫罄崇山之藏秘牒幽經終防羽陵之蠹是惟勅諸茗琬寶同璫琿始克亘千春而不磷歷億劫而益炳矣

况儒林道高宏闊絕學中興業劬載誕貞臣副甄庸之上  
儀咨講對於納陛博洽茂正則有忠益之資論思獻納則  
匪虛華之寵若夫瞻容俎豆振響弦管肅明祀以旌善隆  
皇道以輔真釋奠上丁配享之儀告備宣班大化褒崇之  
典不虛至如淑靈所稟眸容惟穆衣冠雖古風範如在以  
及元勳開漢室之基讚語錄宋賢之手是皆一縑之蹟珍  
于萬籤一楮之遺重于七畧若徒以益州之麻供其傳寫  
衡陽之箱備其藏寘不惟傳播之不廣抑且散軼之滋懼  
也與九性尙耽古業無息版擘翫羣籍弗囿乎咫聞博綜  
百家必求其實是平生希蹤賢豪珍護手澤得寸得尺是  
容是臧當夫山花睇人林鳥悅性殘帙積案古琴挂壁欲

使研雲墨兩並膏心苗碧蘚貞珉悉歸掌錄蓋其軌訓賢  
詰網羅典文躑俗勿免古人是鄰匪直侈明誠之閱覽誇  
彥遠之博聞已也余故敬繹斯卷而附綴數語于後

虞山唐墅志跋

虞山唐墅志三卷里人倪賜開谷纂先是有張處士國輔字陳可世居墅西博涉往籍熟諳舊聞蒐討故實草創未竟倪君踵事克有成書會襄陽太守言公汝泗解組歸田纂修常昭合志倪君譔著採掇爲多然自言志輯成後唐墅志尙無專刻國輔之族孫邦鎮屬余校勘謀付梨棗余惟志之作也班書地理范史郡國椎輪大輅俶肇權輿江表有傳吳地有記汝南先賢襄陽耆舊風流津逮傳播藝林間巷之士敬恭桑梓抱殘守匱懼傳聞之滋誤冀徵信於後來故邑乘者所以備史官之著錄而里志者又以補邑乘之闕遺也唐墅爲常熟巨鎮商賈輻輳塵市鱗次原

臨沃衍水澤淳泓北枕海巫之雄南揖馬鞍之秀在宋淳熙中爲周氏孝子故里在明天啟間爲楊氏應社別業嗣後名儒碩彥景從雲集崑山亭林顧氏居語廉涇吾州南郭張氏寓鳳基園其尤著也初唐墅屬雙鳳鄉後雙鳳隸太倉州州人顧麟士有雙鳳里志倪君此編畧仿其例首載形勝山水古蹟迄風俗物產中述人物孝義文苑迄釋老列女末纂藝文卷目雜記軼事續張氏之舊帙佐言氏之新編辭質而雅事簡而核用心則良苦厥功則甚偉矣唐墅余舊遊地也可掬軒戛雲樓皆諸子講學之處倪君年八十餘余猶及見之史君益村李君詠葭皆與余爲忘年之交湖涇訪春塢邱眺雪強蕪菡萏之花松栢馬驚之

樹十年朋舊聚散搏沙關河阻隔夢魂依戀後之作者臨  
文感喟或於游寓之末附余姓名斯則余所深幸也夫

郎芝田擬古畫冊跋

嘉慶辛未暮春余與寶山黃平泉明經祓蘭禊飲之辰戴笠玉山之道則有芝田郎茂才款扉延客掃徑揖朋流連文酒投贈翰墨芝田光風襲懷古液浸骨儲羣珍于豪素以餘事爲丹青神明于宋人三昧出入于元季四家一幀之紙縱目八荒一寸之練游心萬里嚼墨噴霧則煙澹愈濃點筆綴花則香靜自永繇以麝集惠問鳳翥衆嫩夏乎尙已丙子夏五余偕長子徵璵養疴於鹿城僧舍與芝田衡宇咫尺晨夕過從泉明種柳之居庭柯相對子美浣花之宅水鳥爲鄰迺于談愫之頃示我擬古之冊叩真宰以冥搜運大槩于意匠煙思縹緲雲想變幻虛空粉碎絕大

神通往來儵忽無非靈氣視彼摹形構象遺神襲貌者一  
則飾薦敖之衣冠一則妬闕氏之朱粉奚倩離眸方能洞  
矚聞之榻樓鈞籟則伶夔拊其餘音香殿靈芸則菘施惹  
其刺馥故藉琢鏤之力琬茗蒸蔚而吐虹施縑練之功紺  
錦翻翾而盤鳳余學畫廿載尠有寸進觀君近製指我逃  
津昔梅村祭酒擬杜陵之八仙歌畫中之九友黃華亭墨  
花五色王廉州玉樹三山以例芝田斯其繼起曩者蘭風  
春暖葭露秋寒願言思子愛而不見茲乃倚裳懽晤展圖  
卧遊塵揮碧松案分青玉不惟增讀畫之樂抑亦誌盍簪  
之幸也

淞塘蟹舍畫冊跋

淞塘蟹舍畫冊青浦陸孝廉萊臧屬其友人顧君蕙生臨  
染香畫品寫元真詩意煙疎林密雨細風斜半堤柳橋盟  
鷗得伴一燈蘆岬呼漁有聲遂乃霞想鴻鸞雲情鳳舉縑  
素傳於藝林錙豪攄其藻詠乙亥三月余與萊臧聯襪武  
林惠我前綏發函快靚時則邀笙翠舫煮茗玉泉觴飛花  
下纔過春期夢到蓴邊偏耽秋味眺平皋而怊悵尋枉渚  
以適迴宗少文惟愛卧遊江文通自慚才盡未免雜感縈  
抱百憂攪心而君則蘿笻肩倚松塵手揮平泉興幽濠梁  
趣永非有羨于臨淵若相期乎漁隱夫以泥駮塵轡則素  
衣澀而不消霧笠煙簑則清癖結而莫解矧復結字崧浦

疏泉泖湖芡港紆曲菱灣映帶四時竹影松影一片天光  
水光傍溪獨立持竿小倦曹騰睡去郭索聲來于馬喚俊  
侶張古琴斫霜螯拍銅斗蟲吟四壁之秋客醉九峯之月  
又何必千里萬里翔雙翮於鷓風雲愁水愁羈孤蹤於鴻  
雪也僕情移讀畫願結梯霞他日子猷之權乘興或來幼  
安之牀促膝共坐請以斯圖爲約劑云

彭湘涵誄

維道光元年正月日同里友人彭君卒赴于淮上痛悼累旬聞笛之感每念嵇生素車之馳負慚元伯嗚呼哀哉君諱兆蓀字湘涵一字甘亭世居邑之新塘市後遷城南考諱吳禮以進士起家爲寧武令改潁州教授卒于官君生而岍異器業過人外挺秀采內稟純質曾以象勺之年隨侍樓煩壯遊代朔弔祁連之古營尋沙陀之廢壘赫連別部春蕪射獵之場鮮卑大人秋牧屯兵之地郊鷲駭落山猱捷升嶺谷奔絕沙原莽蒼暇日登眺古懷鬱伊激發志意馳驟風霆聞覽旣閱誤述遂富往來京國名聞公卿龍翰鳳翼麟然炳然泊乎晉陽回車潁水弭楫陟磨盤之山

過峽石之口泥爪畱雪華堂聚星蓼洲之水一曲勺園之  
花十畝呼風月爲齊盟倩烟霞爲客主吸洪河于銅斗大  
有狂生鬥險韻于尖叉非無健者君獨執旗鼓以抗顏駮  
鸞凰而驤首如赤燦之照萬木如滄澗之滙衆壑顧而失  
影驚爲望洋由是知名之士羣焉傾倒冠蓋千里不脛而  
走笙鏞入琅抱景咸叩旣而棘人素冠終天風木枯魚銜  
索廣柳載塗誓墓守禮彈琴成曲始客京口旋之楚州積  
離悵于鄉關托愁心于江上時則州府好士爭薦邴元諸  
侯禮命交推徐弈君以人倫之望負魁傑之才海內人士  
聽采風聲投縞紵者接武執敦槃者斂手飛文染翰振采  
發蒸豐城寶劍蔚爲燭夜之芒玉京洞簫譜入雲英之奏

于斯時也東南壇坫聲華弁冕文盟定霸凡三十年可謂  
盛矣少肄制科屢充秋賦祥金晦彩明珠失曜遂筮天山  
之象希夷惠之跡獨善求志深藏若虛鉅鹿張璠不以版  
謁爲飾潁州胡昭惟以經籍自娛素履獨行白賁无咎守  
道勿貳歷久愈篤今

天子嗣統之初

特設大科徵舉天下孝廉方正之士郡守仁和許君遜懷  
以君名上于大府優賢揚歷備禮致聘君致書郡守謂幼  
承庭蔭壯作鮮民百歲銜悲寸心負疚且尪羸衰體久謝  
交游隨緣挂單跡同老衲衣冠則昌披了鳥面目則山鹿  
野麋竊嘗自念有斷不敢居者一有萬不能就者二是其

惇深操尚履節介石蓋文苑之編與逸民之傳載諸彤珥  
兼斯徽燉矣君處貧能樂屢空晏如審義利于毫末嚴取  
與于一介閔仲叔之口腹不以累人王修齡之飢餒不思  
求粟曾有某公命別駕從事肅奉百金願見顏色者君對  
使辭謝還其金幣無倨傲之色無歆動之容某公亦敬慕  
之不促迫也若其至性肫厚令德孝恭篤兄弟之友愛賑  
宗邨之乏貧萊妻偕隱條悼分鸞荀令傷神不聞置造每  
孤坐一室茶鐫藥臼繩床經案閒逸逸怡怡如也君博  
綜羣帙淹貫百家多聞擇善實事求是披遠閣之古牒發  
崇山之墜簡幾欲使龍威靈寶恣其取攜奎壁星精羅之  
几席然後釐陳編之正偽辨曩說之異同盈箱縹碧夾注

丹黃盛暑螢囊隆冬藜炬中年以後慧業益劭證辟支果  
參最上乘遠師廬山之中已公茅屋之下時面壁而哦詩  
亦拈花而聽講固已八垢俱空九根無碍六通頓解二諦  
胥融脫塵瑣之羈縛極定慧之瑩澈者矣又以釋氏懺摩  
之說卽吾儒悔過之功手錄格言編爲一冊以日用平實  
之訓爲身心切近之學此又極梵行之精純立儒宗之軌  
範者也平生慎交游重然諾如水之淡分涇渭而不淆如  
蘭之香歷風雨而不變明月照其肝膽清飈襲其襟抱起  
頑立儒式浮振靡莊惠之契不關形迹裴魏之交必全終  
始求之古人奚多讓焉余與君生同里閭契洽味歸長而  
遨遊搏沙易散或經年作別卒歲而欸音嶽或天末相望

寓書而通款曲自念蒲柳之姿應先朝露不圖芝蘭之質  
萎爲衰草此則埋庾庭之玉樹大難爲懷過黃公之酒壚  
能無感愴何況道兼師友契合身心鍾期已逝山水之音  
寂然曼卿不歸芙蓉之城安在生前之嫩勒諸貞珉身後  
之名責在後死棄德不書誰執其咎迺作詩曰

滄江靈潤文彥篤生戴一抱悻儲菁稽英華文鳳翥鈞籟  
鯨鏗元圃之玉峯山之榮琳琅金薤駢綴瑤瓊星辰在緯  
鸞鷲同聲慧地昭朗德輝著明外賁其采內全其貞沖和  
清簡鎮靜恬密淵嘿醴粹光輝篤實由豫勿疑勞謙終吉  
黃流在中玉瓚之璉文與行符志以道壹榮利勿馳浮譽  
必怵難進易退知白守黑空山嘯歌窮年著述文憎其命

境頽其身江關蕭瑟風塵苦辛寂寥琴筑厭劬蹄輪嚴霜  
凋鬢悲風恨人削跡家街索居食貧疾疹間作枕蓆恒勤  
抱才但化齋志沈淪淒涼總帳黯慘修門嗚呼哀哉君居  
巷南我居巷北分手異縣別離鄉國煙樹入望肝腸斷絕  
三年夢魂見君顏色昔年日下百憂結輜得君遐訊慰我  
抑塞歸艤倥傯人事偪仄金匱一晤竟成永訣嗚呼哀哉  
存亡隔世哀樂中年月寒舊櫬草長新阡遺棺七尺殘藁  
千編篋衍不鑰墨華尙鮮魂所馮依何能棄捐名山述作  
以付後賢君又無子巾箱孰傳天道至此夫復何言嗚呼

哀哉

胡母汪孺人誄

山陽胡母汪孺人于道光壬午二月某日卒春秋七十有九赴于學署余往視殮素車填巷春歌輟響其冢子玉山次玉峯孫錫嘏錫祺擗踊號泣聲震閭里其宗族姻黨無男女幼長哭皆失聲春暉旣傾芳儀如在賢淑之行遠邇慕之余迺聽采聲聞詳覈徽典將表令圖以光彤珥竊惟思齊之訓淑女以之型家含章可貞坤道利于從事故凡蘋藻之奠季蘭是尸綵纈之功女師無曠姑姆式訓則珩珮諧其德音姪娣感仁則衿纓表其柔色是皆中閨之嫻行抑猶內主之恒儀尙未足以藻飾羣德烏奔來禩也孺人則幼秉惠心長迎善氣種干竿之竹廣蔭慈雲開四照

之花並覃靈雨歲在甲午河隄告災羅柳一潰直灌北關  
淮陰三城幾成澤國龍門脫箬剝膚成切近之災瓠子飛  
瀾束手無宣防之策時則玉山之尊人諱某行役在外數  
月不歸歌阜螽之趨趨僕痛馬瘖嘆予室之翹翹噫音譙  
羽孺人提挈老幼出艱濟險倉皇數日幸而獲免而死喪  
之戚急難相助媼姪之屬調恤必周遂令鏡奩釵鈿已易  
餐錢篋笥衣襦悉歸質庫屢應將伯之呼不厭再三之賣  
旣而飛鴻中澤安宅是謀明月刀頭布颿無恙親朋欣慰  
鄉里懽迎蓋好施之德歸美于君子而樂善之懷實資乎  
內助也若其中年以後癸影獨居益厓如傷之懷能修未  
竟之志歲在丙子淮郡市河淤塞霽霖浹月積潦不通哀

我填寡河麋微漚無知赤子匍匐入水孺人惻然以傷矜  
然動念謂全淮保障專賴隄防而未雨綢繆急思彌患乃  
命玉山營濬川之謀作發棠之請籲告當事特興義舉決  
之使導水歸其壑千邨樹影辨廬舍之參差一曲溪流映  
魚梁之清淺水患于是平息民困于是乎甦此則一郡宅  
田之利歷久愈長而百年桑梓之謀厥功甚鉅也余不能  
爲諛頌之辭謹臚事實而爲之誄誄曰

猗與孺人慈惠之師作善降祥蒞祿是宜樹德務滋食報  
自厚蘭蓀秀發克昌厥後何圖鳳馭忽返瑤閭華蓮殞雪  
湘竹凋霜嶽音是嗣子孫克紹勒之女史永爲坊表

李安人誄

歲在元默時逢盛夏赫曦沸金溽暑灼石吾友程君與九  
之室人李安人猝中痲癘寢疾數日七月之朔溘爾永逝  
程君視含殮畢歎扉來晤余方養痾靜憩彌月不出安人  
之喪猶未之知也揖客入門長言悒優伉儷之重情見乎  
辭安人舊籍吳郡僑寓江都甲第簪黻門楣詩禮大父某  
父某皆以貞期純業式光閭左結璘毓秀茗華吐芬蘭茝  
蘊其慧心瑜玉瑩其昭質少失慈蔭而靜嘉有儀長嫺婦  
功而德容並飭淑慎之譽無間于族人晏笑之聲不出于  
閫外承歡侑醴泛春竿于椒花洗手作羹濯香泉于蘋澗  
令德之教如鳥並翼由房之招如魚比目時則吾友肄習

制科爲學官弟子詞瀾不窮榮問方鬯研京鍊都之思鏤  
月裁雲之製春簾雨深秋鎧風定牙籤萬軸共釵鈿以流  
輝刀尺三更和翻簧而富響當其思來泉涌綺往霞飛削  
柿百番點朱十誦幾欲鴛絲繡去桃葉鑄來料檢簪珥代  
謀梨棗此則倡隨嘉耦疑並豔之尹邢而文字良儔乃知  
音之夔曠也繇以修名克劭令聞廣播或爲紵衣之獻或  
爲雜佩之贈綠波雙槩珠湖水清春雲一樓棗花香淺憶  
自暮春月杪風和景清吾友開柳園以延賓傷藥欄而命  
酒安人則潔整茗盞親治脯修精裨芳菰晨鳧露鵠酌金  
觴之昔釀濯錦浮鱗試白雪之頭綱炊煙避鶴此又中饋  
之職善相夫子式燕且譽好爾無射安人有焉重以剪翠

裁紅流黃織素儷薛氏之鍼神摘天孫之錦段綵絲之蓋  
五重顰鑑之花八出碧紗晝靜卷簾披蛺蝶之圖金釭夜  
明添線剔珊瑚之穗此又棘針沒骨無由肖其精神隨波  
截鴻未足方其工妙者矣今歲季秋吾友爲其母夫人慶  
六十生辰安人將貽奉瑤卮手陳壽幀菊名耐老經秋晚  
而彌榮護是忘憂卜春暉之常湛繡圖待獻裝之寶軸臨  
風展視麟然炳然蓋安人勤修婦職靡間昕夕才與德齊  
慧由福致是皆然已而乃梧翠早凋薜華遽殞星黯慘  
難延娥月之輝碧城邈迤何處彩鸞之駕嗚呼哀哉維時  
空階積蘚落葉添薪吾友抱騎省之新愁吟子荆之佳詠  
玉簫無聲聊訴哀于楮墨彤管有煒爰述德於旒旗誄曰

易筮家人禮詳內則猗與安人允嫻四德淑秉素衷慧臻  
上識室牖尸齋瑀璜協節妯姆式善娣妯輯顏劍俎馨膳  
免蕘視餐終溫且惠考祥其旋綏爾福履彙于華年孤桐  
萎露幽篁泣雨玉真之庭青琳之宇飄搖僊袂翮其遐舉  
人路永隔瑤水修阻嗚呼哀哉粧樓鎖兮麝煙散簾鐙黯  
兮蟲聲秋笙與鶴兮秦女怨羅與綺兮蕭郎愁風淒淒而  
撼壁月沈沈而銜鉤望簾旌而欲斷悵遺挂之猶留嗚呼  
哀哉清淺兮銀潢啁啾兮翠羽朝侍輦于丹房兮夕弭節  
乎元圃去恒幹而不居兮貽芳徽于來許蓀荃兮蘅杜結  
幽思于終古嗚呼哀哉